

修訂日期: 2009/04/23 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 21, No. 1391

原始資料: 蕭鎮國大德提供, 北美某大德提供

No. 1391

佛說檀特羅麻油述經

東晉竺曇無蘭譯

佛在摩竭國因沙奪山中。時佛子羅云隨佛在山中。羅云夜臥為鬼神所燒驚起。明日至佛所為佛作禮。却在—面樹下坐。羅云以手扶頰。低頭不樂默然不語。佛即問羅云。何以低頭如畏怖狀。羅云言我昨日夜臥。為鬼神所燒。佛語羅云。天下或生人燒人。或山神燒人。或道溝邊鬼神燒人。或善死鬼神燒人。來欲試人經道恐人。欲知其心堅濡。佛語羅云。汝取佛辟鬼神呪。後儻有鬼神來燒汝者。持是鬼神名字。以慈心說之。

阿波竭 證證竭 無多薩 憍遲比遲沾波沾波迦羅准 維陵無 因輪無 指輪無
漢沙無 因登羅 宋林羅 和林羅 波耶越羅 檀特羅

佛言是檀特羅經。佛故為諸弟子結恩經。佛告諸弟子。有急者當讀之。鬼神儻來燒人者。當持慈心哀心。淨還自視五藏思念五藏。佛說是經時。日月尚有墮地。佛語終不有異。今佛說是檀特羅經。以說生人欲來燒人者不得燒人。山神亦不得燒人。道溝邊鬼神亦不得燒人。腥死鬼神亦不得燒人。善死鬼神亦不得燒人。聞是語火為不然。食飯得毒毒為不行。欲殺人刀為不向。溺深水中為不沒難。群有四子人行空閑處。若行縣邑中大國中。若對會若大坐中。耆老中伴侶中。步行中坐臥中。值有蠱道家者。向讀是經蠱道為不行。佛即為羅云說。使羅云為諸比丘比丘尼優婆塞優婆夷及諸白衣。皆令諷誦之。